

## “PRIMA LE CASE E POI LE CHIESE” STORIE DI UN SLOGAN ROBÂT

In cheste mê apologje o ài sielt di dâ la preference ai miei rapuarts personâi cu la istituzion e in particolâr cu l'autoritât diocesane rapresentade dal vescul.

Par chel o tâs chei fats che e àn interessade dute la comunitât cristiane e civîl. O, s'in'feveli, o met in lûs chei aspiets che jo ju ài vivûts in prime persone. Chest no lu fâs naturalmenti par sintîmi o par metimi al centro dai fats, ma par dâ il gno contribût personâl di leture e di valutazion. L'unic sevissi veramentri util che o pues dâ in robis plui grandis di me.

Cun chest criteri o salti la tragedie dal taramot e dut ce che il vescul e la curie e àn fat, no àn fat o a podevin fâ. E jè stade une esperience traumatiche par ducj e nissun nol ere preparât. Si po dî duncje, a distance di timp, che si à fate une figure discrete, o disares splendide, almancul dal pont di viste assistenziâl e caritatîf. Cun in plui la presince eroiche dai predis sul puest, a spartî dolôrs e poris insieme cu la lôr int. Ce che al è mancjât, secont me, e jè stade la cjarie profetiche che la glesie e vares vût di puartâ in te grande vore e scomesse de ricostruzion. Soredut domandant un stanp di ricostruzion che al privilegias lis realtâts plui bandonadis e i aspiets tipics di un mont che, s'al murive, o murivin ancje nô. Al è ce che al è stât domandât cun clarece ancje te senblee dai laics dal '77.

Invesit si à preferît, in linie cu la tradizion catoliche, fâ tant, judâ la int, confuartânle, vaî cun jê: dute robe meretorie. Ma no sares stât mancun meretori judâle a viegi i vôi e a judâsi par un progjet globâl so, alternativ a chel cence culture e cence anime dât dongje dal aparât public. Nancje in cjase sô, tal fâ su lis glesiis, la istituzion glesiastiche no jè stade vonde libare, fuarte, alternative, profetiche. Il câs de glesie–astronâf di Maian, insieme cun âtris “perlis”, al restatâ come testimoniance vergognose di sieltis scandalosis.

Di dut chest flagjel al è restât, vie pa l'Italie, il coragjo dal vescul che si rinpinnave su lis maserîs a confuartâ e la grande idee ch'al à vude di domandâ che si fasessin «*prima le case i poi le chiese*». No son peraulis che si sintilis ogni dì e tant mancun su la bocje di un vescul.

Ma ese lade propit cussì?

Che chestis peraulis a setin saltadis fûr dal ambient clericâl e jè vere. Che lis vedi ditis il vescul o la part plui rappresentative de glesie furlane no jè vere. Ansit, al è vêr il contrari.

Chest o pues dîlu percheche il document «*Ai furlans ch'a crodin*» lu ài dât dongje jo insieme cun pre Josef Cjargnel e pre Laurinç Dentesan te canoniche di Luincis di domenie dopomisdî ai 9 di mai, juste tre dîs dopo dal sisme.

Lu vin puartât jù a Udin pe senblee che il vescul al veve convocate ai 11 di mai. J al vin fat viodi a pre Checo a Montenars, che si è dit d'acordo ma al veve tal cjâf i siei berdeis di cjase e di paîs, e a pre Pauli Varut, che al à dit che a erin cjâcaris astratis. «Dàinus i bêz daurman e nô o tornìn a fâ su il Friûl!» al à dit. Une robe biele e forsint vere ma impussibil, soredut in chel moment.

Sicheduncje o vin batût a machigne il nestri scrit in cjase di pre Tunin Cjapielar a Glemone e o vin domandât di leilu denant dai predis.

Stant che i autôrs principâi dal document a erin za schedâts te crepe dal predessam come politicants, o vin cirût di fâ i furbos mandant sul palc un'anime senplice e ingjenue come pre Pieri Degan, prevost di Zui.

Al è lâf su e al à tacât a lei ce che nus pareve che une glesie taramotade e scugnîs dî in chel moment par dâj une man ancje culturâl e spirituâl al popul furlan. I predis lu à lassât lei par un pâr di minûts. Cuanche al à dit: «O pratindin di jessi nô furlans...», dute la conclave e à tacât a fâ un casin dal gjaul, ufindude che ancje in tun moment come chel no pierdessin il vissi di fâ pulitiche, inpen di vaî i muarts. J à tirât vie il microfon e lu à fat dismantâ dal plac invelegnâts.

Alore il vescul, che nol veve la fuarce di inponi 'e senblee che si lassas lei ce che ognun al veve prontât, al à dit che i predis a erin ancjemò sotsore e al ere miei lassâ stâ ogni resonament e strengisi dongje dai predis che a vevin soterade tante int. E par fâ la robe ancjemò plui incorade, al à clamât su i predis dai paîs taramotâts «*seont il numar dai muarts che a vevin vût*».

Mi visi ancjemò di chescj puars predis, bogns, che a lavin su a contâ: «Jo and'ài vûts trente»; «Jo and'ài vûts cincuant»; «Jo and'ài vûts plui di ducj» e cetera. Une robe penose.

E il document programatic?

Furtune che fûr dal teatro dal seminari a erin i gjornaliscj, in spiete di ce che a proponevin i predis. Cussì, intant che e sfilave sul palc la prucision dai predis che a vevin fat funerâi, pre Laurinç Dentesan al à let il nestri document a la stanpe, che dopo lu à trasmitût in lunc e in larc.

O sai che a Milan e àn fate une cunvigne in merit, stant che a ere la prime vôs clare in tun moment di comprensibil disorientament. E Diu al à volût che ancjemò une volte a fossin i solits resiatisc a salvâ la muse di chê istituzion che no veve vude nancje la creance di scoltâ ce che, di predis e di furlans, o proponevin.

Biel che la stanpe taliane e foreste e à vût fevelât a lunc di chest "*pronunciament*", La Vite Catoliche, a furce di vitis pôc catolichis, lu à ripurtât dôs setemanis dopo, in tun cjantonut che nissun nol leve a lei. Nemo propheta in patria in tins normâi. Figurinsi in tun taramot!

O crôt però che e vali la pene di ripuartâ, cumò che la robe e jè finide, e finide avonde ben, ce che nô, te nestre ingjenuitât e te nestre straordinarie (par chei agns e par chei moments) voe di fâ, o proponevin, come glesie, a dute la comunitât furlane e al stât. Cualchi toc lu riten profetic.

E chest lu dîs cussient che Diu, come ch'al à profetât midiant de musse di Balaam, al pò fâ bielis robis ancje midiant dai puars mus de glesie furlane.

## AI FURLANS CH'A CRODIN

Nô, predis de diocesi di Udin, o vin braure di jessi purision de cheste Glesie Furlane che in ogni moment de so storie martoriade si plêe fin par tiere ma no si creve e che ancje cuanche lis disgraciis a plombin di no spietâlis, a si mostre simpri pronte al passaç dal Signor.

O metin tes mans di Diu chêi che àn cjatât il lor Vinars sant sot lis maseriis, ma biel che ur disin "mandi" a lôr, o savìn che par nô che o sin ancjemò achì, il prin dovê al è chel di cjalâ indenant e di tornâ a meti in pins la nestre Patrie pe milesime volte.

Cence cjapâj la volte a di nissun, ma par che sielte ch'o vin fate di servî la nestre int no dome te muart, ma ancje pardut là che si celebre la so vite, o pensìn, come presbitèri, di fâ rivâ lis nestris propuestis semplicis ma risoludis a

ducj chêi che disin di jessi a servissi dal Friûl. Chest cence volê puartâj vie il mistîr a di nissun.

1) Il nestri popul no si e mai tirât indaûr tai confronts dal Stât Talian. A si è sacrificât in vuere, al è lâf pal mont, al à strussiade la so vite, al à judât chêi plui biâts di lui. Cumò, te so disgracie, nol domande nè dûl nè caritât. Al crôt di vê drit a un tratament compain che il Stât al à fat cun cheâltris. Nè plui nè mancun.

2) Cuanche il Stât al varà fate la so part, o pratindìn di jessi nô Furlans a decidi di siegi il mût di tornâ a meti in pins la nestre tiere come che la nestre sensibilitât e sperience di popul, ingrumade di secui, nus consearà miôr. A la cual o domandìn che ce ch'al darà no si pierdi tal furmiâr de burocassie dal Stât e de region, o ben passant traviers cjanâi che nô no sintìn come nestris. I Ents locâi, in prime rie i Comuns che nô o vin metût su liberamentri, e àn di jessi chêi che cjaparan in man cheste opare, in mût che i ajûts a rivin 'e int. Su chest nol è di molâ gran.

3) O pratindìn che i Partits a metin di bande speculacions e calcui politics, e che cjatin une union tal unic intendo di siervî il lor Popul. A lôr ur disìn daurman che se ciraran di sfrutâ anje cheste disgracie pai lor calcui o par procurâur ai Furlans un'âlre umiliasion, come ch'al è stât sucedût in altrò, a cjataràn i predis furlans compats cuintri di lôr.

4) Prime robe di fâ al è di cjatâ un sotet provisorio par dute la int dongje dal lor paîs e des lor tieris. O vin un slac di casermis. Come che in timp di vuere, i militârs e àn vût il drit di ocupâ lis cjasis de int, cussì la int e à di podê jentrâ daurman tes casermis, ch'and'è tantis e grandonis, e chel ch'al vâl di plui, dongje dai paîs plui batûts. Chest al è ancjemò plui just se si cjalin lis siervitûts miliars che nus pesin ogni pît alçât.

5) I Furlans, forsit plui di une cjase stabil, a comencin zà a domandâ di lavorâ. Rispuindi a di cheste voe di fâ e jè l'uniche maniere par dâj sperance te vite a di un Popul ch'al à simpri vût riguart di jessi mantignût. Il Stât che no si è mai pensât di meti sù une fabriche a partrecipasion statâl tal Friûl storic, al podarà di che strade anje parà jù un pecjât di omission.

6) Simpri fevelant di ocupasion, o domandìn, in fuarce di une Region che si vante di jessi autonome e che no à fat ce che regions cun mancun fuarce pulitiche e àn savût cumbinâ, che si cjapin provediments imediâts, in forme di leç, par dâ in precedence assolude a 'e nestre int il puest di lavôr, massime tes scuelis, tai ufissis, e par dut là che il nestri Popul al à di cressi cu la so tipiche culture. Se al è stât just clamâ mestris e infermieris furlanis a viodi dai fruts e dai malâts intant dal taramot, no capìn parceche cheste robe sacrosante no ledi ben cuanche a jè finide la disgracie.

7) I nestris paîs e àn di tornâ sù cun dute che ricjece di personalitât e caratarisasion che vevin. Al è di fonde rispjetâ l'ambient naturâl, storic, etnologic de furlanè, inibint dal dut barachis, baracons e casarmons, che laressin di Diu par chêi che spiculin anje sul mal, ma che copareassin la spontaneitât e iripetibilitât dal vivi furlan. A varàn anje di tignî cont che la

nestre int a vîf in buine part cu la campagne, e che sares snaturade e folpeade se la sierassin in condominis.

8) Come predis, o vin viodût che la nestre int e à celebrât in chescj dîs la plui bieles Messe de so storie, stant un dongje l'âtri e mostrant une fuarce morâl che nissun nol vares mai crodût. Cheste int e savarà cjapâ fuarce ancje cence une glesie di claps. Poben, o domandìn che passi dal dut in prime rie la preocupasion di tornâ a dà un sotet dignitôs a di ogni famèe, scomençant des plui puaris. Cul timp, se Di'orà, si podarà ancje pensâ di tirâ sù culache glesie, che mostri ancje te so struture che il Signôr al è a stâ cun nô, cence manîs di grandece e monuments che no àn parintât nè cul Signôr nè cui furlans.

9) Chest flagjel nus à batûts ancje tun âtri fil de nestre anime, cuanche al à sdrumât monuments che jerin come libri viert de nestre storie. O podìn ancje spietâ, ma o volìn che chescj lucis sants a tornin in pins, parceche un popul al vîf ancje di ce ch'al sa mostrâ di sè a di chêi che vegnin dopo. Une robe e à di jessi clare: no si à plui di sacrificâ la vite dal omp pai monuments e pai museos. S'al covente, che si sielgin prime (e chî o intindìn riferîsi a une serie programasion, cun massime autoritât ai Comuns) puescj difarents, in mût che la vite di jêr no sedi un stralenc pe vite di vuê.

10) Par vie che l'omp nol vîf dome di pan, o tornìn a bati il claut de universitât autonome furlane, riconfermant l'impegno cjapât in Assemblèe. O denunci la banalitât e la disonestât dai cantins tirâts fûr in chescj dîs achî cuntri di chest sacrosant dirit. Chêi ch'a àn fuarce pulitiche che sepin che cumò e àn un mutîf di plui e grâf par mostrâ la lor muse cence fufignis. Nol è just zujâ cu la biade int. Le universitât e fâs part de ricostrusion!

11) La Glesie Furlane, cence jentrâ in cuncurince cun nissun, e met dute la so fuarce a servissi dal so Popul, e si batarà fin che tirarà flât par che vegnin ricognossûts i siei dirits cence cjâlâ in muse nissun e risciant come ch'al à simpri riscjât lui. Simpri par lui o metìn a disposicion ce che cui siei sudôrs e la so fede si veve rivât a fâ: seminaris, cjasis parochiâls, ricreatoris e colonîs, e âtri ch'al covente, vendint ancje robe di valôr.

12) In chest spirit o proponin che ducj i santuaris, ancje se no son sot la bachete dal vescul, ma che vivin cu lis ufiertis di cheste int tant provade, a passin dut ce che no ur covente par vivi, par judâ chêi che ju àn mantignûts fin cumò. Ducj chêi che volaran vignû ca di nô, a cjataràn la parte vierte e la nestre disponibilitât in dut ce ch'o podìn. O incarichìn i nestrîs argains di Curie di formâ prin che si po un centro di coordinament par chestis robis, lassant di bande cumissions e ufissis diocesans che no coventin.

Che il Signôr al dêi la pâs ai vîfs e la requie ai biats muarts.

*I predis de Glesie Furlane*

Friûl, 11 di maj 1976

Un document, come che si viôt, butât jù propit intant che le tiere a sdrançave, cun dute la cjarie emotive dal moment. Che no nus à inpedît però di mantignî intate la razionalità: Fîs de emotivitàt a puedin jessi, par esenpli, la propueste di ocupâ lis casermis (che e à fat sustâ dut l'ambient militâr e conservadôr, comprendût bons. Moret) e chê di “nazionalisâ” i santuaris par dut il timp de emergjence. Ma no erin par nuje sbaladis.

A la razionalitàt investit si pò dâj la maternitàt de propueste di fâ su prime lis fabbrichis e po lis cjasis e po lis glesiis. Ancje cheste induvinade.

Si sa che un popul nol vîf dome di documents e di propuestis. Però al covente, dongje dal cûr, ancje il cjâf, so redut in chei moments là che un popul al riscje di murî. A proposit di cjâf, pre Checo al notave che la int e vignive tirade fûr in doi sistemis. I muarts ju tiravin fûr pai pîs e i vîs pal cjâf. «Par chel o volìn l'universitàt - al bateve -: par saltâ fûr des maseris cul cjâf».

Al sares stât tant plui facil e al vares rindût di plui vignî fûr cun tun document vajarot. O vin sielzude la strade plui scomude di zujâ sul timp e su la fuarce morâl de nestre int.

Vê fat par prin, come glesie, un document dal gjenar o pensìn che e seti stade une robe inpuartante. O vin salvade la muse de glesie, che e à podût fâsi bieie di un document che no dome no lu à fat jê o almancul aprovât, ma che no lu à nancje lassât lei.

APOLOGJE pro manuscripto, pre Antoni Beline